

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

1 Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyí cuví apóstol chi ra, tacuhva vatyí sacote chi ñáyivi yoso caa sacacu Nyoo añima yo.

²Ihya cuví tuhun cha catyí Nyoo chi yo tyi cusacuvi ra, ta chicunyaa nu tutu tuhun ra tandihí cha tyaa ra profeta ta cha naha. ³Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyí quichí ra siquí ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra. ⁴Ta Nyoo chihin Tatyí Ii ra sacotó cachi ra chi yo vatyí Sehe ra cuví chi ra, vatyí sanandotó ra chi ra chihin cha ndicha ñuhu ra. ⁵Ta cha cuenda maa ra Jesucristo chahá Nyoo tumañi iñi chi nyuhu cha cuhun ndi cucaca ndi tyiño ra, tacuhva nachino iñi ñáyivi chi ra nicahnu ñuhu ñáyivi, ta quichaha ñu chi ra. ⁶Ta mahñu ñu cuan, ñohó tucu nyoho vatyí suri nacana tucu ra Jesucristo chi nyoho.

⁷Sacuhín tutu ihya chi tandihí nyoho cha iyó ndo ñuu Roma. Cuñí Nyoo chi ndo ta nacana ra chi ndo vatyí coo ndo noo ñáyivi cachi cha sacahnu ndo chi ra. Na naquehen ndo cha vaha ta cha taxi ri cuñí añima ndo cha chahá Sutu yo Nyoo ta Sutu Mañi yo Jesucristo chi yo.

Nu catyí ra Pablo vatyí cuñí ra cuhun ra ñuu Roma

⁸Cha xihna ri chahí tyahvi nyoo chi Nyoi chihin sivi ra Jesucristo, cha cuenda tandihí nyoho. Vatyí tandihí ri ityi cahán ñu tuhun vatyí chinó xaan iñi ndo chi ra Jesucristo. ⁹Ta tyiño nuu Nyoo sacuví yuhu chihin cha tandihí añime. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyí chitó ra tyi tyicuan ri nicohón iñi chi ndo cuhva cha chicán tahvi chi ra. Ta chicán tahvi cha cuenda ndo. ¹⁰Chiquén chi Nyoo na cuví cuhva cuñí ra, ta cuhin nu nyicú ndo, vatyí cha naha xaan cuñí cuhin. ¹¹Vatyí cuñí tyinyei chi ndo, ta naquehen ndo cha vaha cha chahá Nyoo ta cuní

ca iñi ndo. ¹²O cuñí chi catyí vatyí sanií yo iñi tahan yo chihin cha chinó iñi yo, tari chinó iñi nyoho ta yuhu ñandíhi.

¹³Yañi, cuñí tyi coto ndo vatyí cuaha xaan chaha cuñí cunyehe nu nyicú ndo, soco nya vityin ta ña chahá chi cuhva chii. Cuñí vatyí cunií ca iñi ndo tari ndunií ca iñi ñu vehe ñuhu inga ñuu nu chahin. Vatyí tatu ndunií iñi ndo, ndunií tucu iñi yuhu. ¹⁴Vatyí nyaá siqui cha cahin tuhun Nyoo chihin tandíhi ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñí iñi. Tahán chi cha cahin chihin tandíhi ri ñu. ¹⁵Yucuan chaha, cha cuenda yuhu, cuñí xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶Yuhu ña cahán nui cahín tuhun Nyoo, vatyí ihya cuví fuerza Nyoo cha sacacú chi tandíhi ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu. ¹⁷Vatyí tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: “Ñu cha nduvahá añima saha Nyoo, coo ñu noo ñáyivi chaa chihin cha chinó iñi ñu chi ra.”

Tandíhi ñáyivi ta iyó cuatyí ñu

¹⁸Ta nyehé yo vatyí nya nu nyaá Nyoo nya andivi ta tachí tuñi ra

chi ñáyivi quiñi iyó, ñáyivi ña vaha. Ta cha quiñi iyó ñu, ña chahá chi coto ñu cha ndicha. ¹⁹Chitó vaha ñu tyi tuhun vaha cuví tuhun Nyoo vatyí suri maa Nyoo sañahá ra chi ñu. ²⁰Vatyí vasi ña nyehé yo chi ra, cuví coto yo vatyí iyó ra vatyí nyehé yo tandíhi cha savaha ra. Nyata chinqo ñuhu ñáyivi ta tandíhi cha savaha ra ta sañahá chi chi yo vatyí maa ra cuví Nyoo, ta tunyee iñi cha iyó chi ra ma ndíhi maa. Yucuan chaha ma cuvi catyí ñáyivi tyi yori Nyoo iyó. ²¹Ta vasi cha chitó ñu tyi iyó noo Nyoo cahnu, soco ña sacahnú ñu chi ra tari cuhva tahán chi cha sacahnu yo chi ra. Ñi ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondo cha chiñi tuñi xiñi ñu ta ndoq ñu nu ñaa iñi. ²²Vasi catyí ñu tyi chitó xaan ñu soco ñu tondo cuví ñu. ²³Vatyí cha nuu cha sacahnú ñu chi Nyoo ra cahnu ca cuví, ra ña tuhva chihi; sacahnú ñu chi xitohyo cha caá tari caá ñáyivi tuhva chihi. Ta nyacua nya xitohyo cha tari caá saa, ta coo, ta quití cha cumi tahan chaha, ta sacahnú ñu.

²⁴Yucuan chaha saña ndaha ndíhi Nyoo chi ñu na sacuvi ñu tandíhi cha quiñi caa cha quichí cuvi iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu. ²⁵Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savaha Nyoo ta ña cuñí ñu sacahnú ñu chi maa maa ra. Vatyí chi maa ra tahán chi

sacahnú yo tyicuan ri maa. Ta na cuvi chi tyicuan caa.

²⁶Yucuan chaha sañā ndaha Nyoo chi ñu na sacuvi ca ñu cha chahá ticahan nuu chi ñu. Vatyí nyacua nya ñusihí nasama ñu cuhva nyacuví ñu, vatyí ca iyó ñu chihin tahan síhi ñu, ta ña tahán chi tyicuan caa. ²⁷Ta tyicuan caa tucu rayíi, casandihí ra cha ca iyó ra chihin ñasihí ra, ta quichí cuvi íñi ra cacao ra chihin tahan yíi ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi Nyoo chi ra ta tiví ra cha cuenda cha quiñi caa cha canyacuví ra. ²⁸Ta chaha cha ña cuñí ca ñáyivi nacoto nuu ñu chi Nyoo, yucuan chaha sañā ndaha ra chi ñu na caca maa xiñi ñu cha quiñi caa, ta sacuvi ñu cha ña tahán chi sacuvi ñu. ²⁹Vatyí tandihí nuu cha ña vaha sacuví ñu. Iyó ñu chihin inga rayíi ta ñima yíi ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichi cuvi xaan íñi ñu coo ca chí ñu. Nyacuví ñu cha quiñi caa. Nyiyó xaan íñi ñu cha chí inga ñáyivi. Chahñí ñu. Iyó ñu tísihí chihin tahan ñu. Sandaví ñaha ñu chí tahan ñu. Ta quiñi xaan ca iyó ñu. Ta ñii ñu cuendu. ³⁰Cahán ña vaha ñu siqui inga ñáyivi. Ta tasi cuñí ñu nyehe ñu chí Nyoo. Tyityi íñi ñu. Ta cahnu sahá ñu chí ñu. Casanducuahá ca ñu cha quiñi caa. Ta ña quichahá ñu chí sutu ñu, ta chí síhi ñu. ³¹Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chí cuñí ñu. Ta ña casahá ñu ticahnu íñi chí tahan ñu. Ña ndahví cuñí

ñu nyehe ñu chí tahan ñu. ³²Maa ñu chitó vaha ñu ñáá cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chí tuhun chíhi chí ñu ta cuhun ñu anyaya. Soco maa ñu sañihí ca ñu sacuví ñu. Ta nyacua síi cuñí ñu tatu sacuví inga ñáyivi cha quiñi caa.

Tachí tuñi Nyoo chí ñáyivi soco chihin cha ndicha

2 Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacouín cuatyun. Vatyí suri iin ri cha sacuvún chihin ñu nyehún ta cahún. ²Vatyí chitó yo vatyí Nyoo tachí tuñi ra chí ñu nyacuví tyehe caa, soco chihin cha ndicha ta chihin cha ndaa, tachí tuñi ra. ³Ta yoho cha cahán nyaun chí inga ñu, suri iin ri cha sacuvún chihin ñu. Cutachi tuñi Nyoo chuun cha cahún tyehe caa. ⁴¿Ñáá tuhun ña quichahún cha cundahvi cuñí Nyoo nyehé ra chí yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón? ⁵Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihí ca cutachi tuñi ra chuun quívi cutachi tuñi ra chí ñáyivi. Ta cunyehe yo tyi chihin cha ndaa ta chihin cha ndicha tachí

tuñi ra chi yo. ⁶Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quivi cutachi tuñi ra chi yo. ⁷Ta cuhva ra ñáyivi cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihi cuan chi ñu cha cuenda vatyí sacuví ñu maa maa ri cha vaha chihin cha cama iñi ñu. ⁸Soco ñihi xaan cutachi tuñi ra chi ñáyivi sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha. ⁹Cuaha xaan tindoho ta tucuihya iñi cunyehe tandihi ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyivi cuenda ra. Ta tyicuan caa tucu cutachi tuñi ra chi ñu cha ñima ñu Israel cuví. ¹⁰Soco chi tandihi ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sií cuñi ra chihin ñu. Ta cucuhva ra cha taxi ri coo ñima ñu.

¹¹Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, iin ri cuhva cuñí maa ra chi yo. ¹²Vatyí tandihi ñu casacuví cuatyí ta ña chitó ñu ley cha chahā Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahā Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan. ¹³Vatyí ñu cha chiñí ley, ta ña nyacuví ñu

cuhva catyí Nyoo, ñima ñáyivi vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo. ¹⁴Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi ñima ñu, ican cuví ley ñu. ¹⁵Vatyí chihin cuhva iyó ñu, sañahá ñu vatyí ñima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu. ¹⁶Cha tyaa Nyoo tyiño chi ra Jesucristo vatyí coo quivi cusandaa ra cuatyí tandihi ñáyivi iyó siqui ñuhu ñáyivi cha cuenda tandihi tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahā Nyoo chi ra Moisés

¹⁷Soco yoho catyún tyi ra Israel cuvún. Ta catyún tyi sacuvún cuhva catyí ley cha chahā Nyoo chi ra Moisés, ra cuví nuu chi ñu Israel quivi cuan. Ta cahnu sahún chuun tyi catyún tyi caá tuhun Nyoo ñimon. ¹⁸Ta chitón cuhva cuñí Nyoo ta ley cuan sañahá chi chuun cha nacachún cha vaha, catyún. ¹⁹Ta vaha xaan sañahún ityi chi ñu cuaa, cuñí maun. Vaha xaan sacatón ñuhú chi ñu cuahan nu ñaa iñi, cuñí maun. ²⁰Ta cuñí maun vatyí chitón saquehen ityun chi ñu cha ña chitó. Ta vatyí chitón tandihi cuii ley ta cha ndicha, chitón yoso caa sañahun chi ñu ña chitó, cuñí maun. ²¹Tatu tyicuan caa yoho sañahun chi inga ñáyivi,

¿ñáá tuhun ña sañahún chi maun? Tatu suri maun catyún vatyí ña tahán chi suhu yo, ¿ñáá tuhun cha tyi maun suhún? ²²Tatu suri maun catyún vatyí ña tahán chi coo inga ñushi chi noo rayii, o inga rayii chi noo ñaha sihi, ¿ñáá tuhun cha vatyí maun tyicuan caa sacuvún? Tatu tasi cuñún chi xitohyo, ¿ñáá tuhun cha suhún cha tyayii cha iyó nu nyicú chi chichi vehe ñuhu? ²³Cahnu sahún chuun vatyí chitón ley Nyoo, soco ticahan nuu chahún chi Nyoo cha cuenda cha ña sacuvún ley cuan. ²⁴Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

²⁵Ndicha vatyí cha sacuví ñu tuhun cha tahnya chiin ñii xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihi ley cha chaha Nyoo chi ra Moisés ñandihí. Soco tatu ña sacuvún cha catyí ley cuan, tari quivi cha ña sacuvún costumbre circuncisión cuví cuan. ²⁶Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu. ²⁷Ra cha ña sacuví costumbre cuan, soco quichahá ra cuhva catyí ley, cusanatuví ra chi yoho cha ña quichahún, ta yoho, ra chitó ley ta ra sacuví costumbre circuncisión cuvún. ²⁸Vatyí ñima cha cuenda vatyí ñu Israel cuví ndo ta chihin

cuan ta cuví ndo ñáyivi chi Nyoo. Ta ni ñima cha cuenda cha sacuví ndo tuhun circuncisión. ²⁹Vatyí ñáyivi nyaá ley Nyoo ñima, ican ñu cuví ñu ñu Israel cha ndicha vaha. Tari quivi tyaa Tatyí li seña cuan ñima ñu, ta ñima ñii ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3 Tatu tyicuan caa, ¿ñáá cha tyinyeé chi yo cha cuví yo ñu Israel? ¿O atu tyinyeé chi chi yo cha sacuví yo tuhun circuncisión? ²Cuaha cuhva tyinyeé chi. Cha xihna ri, Nyoo chaha ra ley maa ra chi yo ñu Israel. ³Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuví ca Nyoo cuhva catyí ra? ⁴Ñima! Soco na saha yo cuenda vatyí Nyoo ndicha ra. Sacuví ra tandihí cuhva cha catyí ra. Vasi tandihí ñáyivi cahán ñu cuendu. Vatyí nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyivi vatyí ñahri cuendu cahún.

Ta cunyehe vaha ñu chuun vatyí ndicha cha cahún.

⁵Chitó yo vatyí vaha ca quetuví noo cha ndii tatu nyaá noo cha mecu xiin. Ndií xaan ca nyehe cuan. Cha ndicha cuví cuan. Soco catyí ñáyivi vatyí tyicuan caa tucu maa Nyoo chihin yo, ndii xaan ca natuvi ra tatu yoó ta cunyacuví ca yo cha quini caa. Sacahnú yo chi ra cuví cuan, catyí ñu. Tyicuan ta ña tahán chi tachi tuñi ra chi yo, catyí ñu. Soco tatu tachí tuñi ra chi yo, ña vaha ra vatyí yoó sacahnú yo chi

ra, catyí ñu. ⁶Ña vaha cuhva cahán ñu, vatyí tyehe ta ña vaha Nyoo ma cuvi tachi tuñi ra chi yo. Soco chitó yo tyi tahán chi tachi tuñi ra chi yo cha cuenda cuatyí yo. ⁷Tatu nyehé yo tyi vaha Nyoo chihin cuatyí sacuví ñáyivi, ¿atu tahán chi tachi tuñi ra chi ñu? Catyí ñu tyi ña tahán chi, soco ña ndicha. ⁸Tyehe ta ndicha cha cahán ñu cuan, vaha taxin ca sacuvi yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha catyí tyi cahán ñu cuendu siqui ndi.

Tandíhi yo ta iyó cuatyí yo

⁹Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyí cha yahá sañahi chi ndo vatyí iyó cuatyí tandíhi yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo. ¹⁰Tyicuan caa catyí nu tutu Nyoo, nu catyí chi tyehe caa:

Yori maa ñáyivi vaha iyó, cha ni ña noo maa.

¹¹Yori ñu cutuñí iñi tuhun Nyoo.

Yori maa nanducú chi Nyoo.

¹²Tandíhi ñu sandoó ñu chi Nyoo, ta tandíhi ñu ta sacunaá ñu chi ñu.

Yori maa ñu sacuví cha vaha.

Cha ni ña noo maa.

¹³Tari noo ñaña ndiyi cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

¹⁴Maa maa ri ca maa cha quiñi caa cahán ñu.

¹⁵Yatyí xaan ñu cha cacahñi ñu chi tahan ñu.

¹⁶Chahá xaan ñu tundocho ta tucuihya iñi chi ñáyivi chihin cuhva iyó ñu.

¹⁷Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸Ni ña chicá iñi ñu tatu tachi tuñi Nyoo chi ñu noo quiñi, catyí chi nu tutu Nyoo.

¹⁹Chitó yo vatyí tandíhi cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuvi catyí ñu tyi ñahri cuatyí ñu. Soco coto ñu vatyí cutahan chi cutachi tuñi Nyoo chi ñu vatyí iyó cuatyí ñu. Ta tyicuan caa tucu tandíhi ñáyivi iyó siqui ñuhu ñáyivi. ²⁰Ni minoo ñáyivi ma cuvi cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chi cha cuenda vatyí sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

²¹Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chi yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha. ²²Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

²³Tandíhi ri ñáyivi sacuví ñu cuatyí, ta cañi xaan nyaá ñu chihin

cuhva cuñí Nyoo, ta cha tyaquí Nyoo ma cuvi cunyaa chihin ñu. ²⁴Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tiin cuenda ca ra cuatyí yo. Vatyí chahnyá ra Cristo Jesús cuatyí yo. ²⁵Nyoo saquichí ra chí ra Cristo vatyí cati ñíni ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chí yo tatu chinó iñi yo chí ra Cristo. Ta cuví chí tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tiin cuenda ra cuatyí ñáyivi cha cuenda vatyí cuchaa chí noo quívi cha cuquichi ra Cristo ta sanaa ra cuatyí ñu. ²⁶Ta tyicuan caa cuví tacuhva vatyí nyehé ñáyivi vatyí Nyoo tyicuan ri vaha ra, ta sahá ra tuhun tyi vaha tandíhi ñu chinó iñi chí ra Jesús. ²⁷¿Atu cuví sacahnu yo chí yo vityin? Ma cuvi. ¿Ñáá tuhun? Cha cuenda vatyí ma cuvi catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chí ra ta cuvaha yo nuu ra. ²⁸Cha chitó vaha yo vityin vatyí Nyoo sacuvahá ra chí yo nuu ra chihin cha chinó iñi yo chí ra, ta ñima chihin cha sacuví yo cha catyí ley ta cuvaha yo nuu ra. ²⁹¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chí ra. ³⁰Vatyí noo tuhun ri maa ra iyó. Ta ican ra sacuvahá ra chí yo nuu ra cha cuenda cha chinó iñi yo chí ra. Cuví ri yo ñu sacuví tuhun circuncisión cuan, o cuví ri yo ñu

ña sacuví. ³¹Tatu tyicuan caa, ¿atu ña vaha ca ley chahnu cuan? iÑima cha ña vaha ca! Vaha. Soco vityin chihin fuerza maa ra Cristo sañahá yo vatyí ndii maa cha catyí ley cuan ta ndicha.

Cuhva chiyo ra Abraham sañahá chi chí yo yoso caa cuvaha yo nuu Nyoo

4 ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra? ²Tyehe ta cuvahá ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chí ra, soco ñima nuu Nyoo. ³Vatyí ¿ñáá catyí nu tutu tuhun Nyoo? Catyí chí vatyí ra Abraham chino iñi ra chí Nyoo, ta cha cuenda cha chinó iñi ra chí Nyoo, Nyoo sahá ra tuhun tyi vaha ra. ⁴Vaha, vityin cuacuhve noo cuhva chí ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño sahá ra, ican cuví. ⁵Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyí Nyoo sahá ra tucahnu iñi chí ñu iyó cuatyí, Nyoo cusaha ra tuhun tyi vaha ra cha cuenda cha chinó iñi ra chí ra. ⁶Ra David cahān ra tuhun tusii iñi cha iyó chí ñáyivi cha sahá Nyoo tuhun vatyí vaha ta ña tiin cuenda ra cuatyí cha sacuví ñu. ⁷Tyehe caa catyí ra David: Ñáyivi cha sahá Nyoo tucahnu iñi cuatyí, sii xaan cuñí ñu, vatyí Nyoo ña tiin cuenda ra cuatyí ñu.

⁸ Siñ xaan cuñí ñu ña tiin cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ññi cuví tusií iñi ihya, o cuví tucu chi cha cuenda ñu ña sacuví cuan? Cha yaha sañahi chi ndo vatyí Nyoo saha ra tuhun tyi vaha ra Abraham cha cuenda cha chinó iñi ra chi ra. ¹⁰ Soco ¿ama saha ra tuhun tyi vaha ra? ¿Atu cha ni cumañi ca sacuvi ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca. ¹¹ Yaha cuan ta sacuví ra Abraham tuhun cuan, tari noo seña ri o sellu vatyí Nyoo cha yaha saha ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandíhi yo ñu chinó iñi Nyoo vasi ña sacuví yo tuhun circuncisión. Ta tyicuan caa, Nyoo sahá ra tuhun vatyí vaha yo. ¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quivi cha ta sacuvi ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyiví chihin ra. Soco savaha Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó iñi ra chi Nyoo, ta Nyoo saha ra tuhun vatyí vaha ra. ¹⁴ Tyehe ta maa maa ri ñu cha sacuví cuhva catyí ley, cuñihi ñu noo cha

cucuhva Nyoo, ñahri yahvi nyaá cha chinó iñi yo chi Nyoo, ta ni ñahri yahvi nyaá cha catyí ra tyi cuhva ra chiyo. ¹⁵ Vatyí ley cuan sañahá chi vatyí tahán chi tachi tuñi Nyoo chi yo tatu ña sacuví yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyí cuví chi noo tumañi iñi cha chahá ra chi tandíhi yo cha cuví yo ñáyivi chi ra Abraham. Ñima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandíhi ñáyivi cha chinó iñi chi Nyoo. ¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?”, coo siqui ñuhu ñáyivi”, catyí ra chi ra Abraham. Ta cha catyí ra tyicuan caa, cuñí chi catyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndiyí, ta chihin tuhun cahán ra sacoó ra cha cumañi ca coo.

¹⁸ Ra Abraham chinó iñi ra chi Nyoo vasi ma cuví ñihi ra promesa cuan tyaá maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñáyivi, tari cuhva catyí Nyoo chi ra: “Tyehe caa cucucuaha ñáyivi chuun”, catyí ra chi ra. ¹⁹ Ra Abraham ña sandíhi ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cúvi ra. Tari maa ra ta tari cu Sara ñasihi

ra, ma cuvi ca coo sehe ñu, tyi cha chahnu xaan ñu. ²⁰Soco ña ndu uvi iñi ra cha cuñihi ra cha catyí Nyoo tyi cuhva ra chi ra. Soco chinó iñi ra chihin cha ñi iñi ra. Ta yihí ca iñi ra chi Nyoo. Ta sacahnú ra chi ra, ²¹cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra chi ra. ²²Yucuan chaha Nyoo saha ra tuhun tyi vaha ra cha cuenda cha chinó iñi ra chi ra.

²³Saha Nyoo tuhun vatyí vaha ra Abraham chaha cha chinó iñi ra chi ra. Ña chicunyaá nuu tutu vatyí noo ri ra Abraham cuvaha ra, ²⁴soco chicunyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó iñi yo chi ra, vatyí ican ra sanandoto chi ra Jesús, Sutu Mañi yo. ²⁵Ta maa ra chaha cuenda chi ra Jesús tyi cúvi ra cha cuenda cuatyí yo, ta nandoto ra tacuhva vatyí cuvi cuvaha yo nuu ra.

**Vityin cha nicoo vaha yo
chihin Nyoo, cuaha cha
vaha cucuhva ra chi yo**

5 Ta cha yaha nduvaha ñima yo nuu Nyoo cha cuenda cha chinó iñi yo chi ra, nicoo vaha yo chihin ra cha cuenda Sutu Mañi yo Jesucristo. ²Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chi ra. Yucuan chaha ñi iñi yo ta sii cuñi yo, ta yihí vaha iñi yo vatyí cucuhva ra cha cuahnu cuvi yo chihin ra. ³Ta ñima yucuan ri cusii cuñi yo, tahán tucu chi cusii cuñi yo quivi nyehé yo tindoho. Vatyí chitó yo vatyí cha nyehé yo tindoho

cuan cutuhva ca yo coo cha cama iñi yo. ⁴Ta tatu chihin cha cama iñi yo, yahá yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndii maa cha cucuhva ra chi yo. ⁵Tatu yihí iñi yo chi maa ra, ma cucahan nuu yo nyehé yo chi ra, vatyí cuñi xaan ra chi yo cha cuenda Tatyí li ra cha chaha ra cunyaa ñima yo.

⁶Vatyí quivi cha ña ñihí ca yo yoso caa sacuvi yo chihin cha cuaha cuatyí yo, quivi cuan quichi ra Cristo, quichi cúvi ra cha cuenda yo ñu iyó cuatyí. ⁷Chitó yo vatyí yori caña iñi cúvi tyiño nuu noo ñáyivi. Vasi xityi ri caña iñi ñu cuhva ñu ñáyivi ñu cha cuenda noo ñu vaha xaan. ⁸Soco yucuan cuvi nu sañaha Nyoo vatyí cuñi ra chi yo, vatyí quichi cúvi ra Cristo cha cuenda yo vasi iyó xaan cuatyí yo. ⁹Ta vityin cha cha yaha cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cuhun ca yo anyaya nu cutachi tuñi Nyoo chi ñáyivi ña chinó iñi chi ra. ¹⁰Quivi cuan xaan cuvi iñi yo chi Nyoo, soco sanicoo vaha ra chi yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihi ra chi yo vatyí iyó ñáyivi ra Cristo ñima yo vityin cha iyó vaha yo chihin ra. ¹¹Ta ñima ihya ri, soco cusii tucu cuñi yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹²Cha cuenda noo rayii quihvi cuatyí siqui ñuhu ñáyivi ta chicoo

tuhun chihi. Ta tuhun chihi cuan chicoꝝ chi siqui tandihi ñáyivi vatyí tandihi ñu sacuví ñu cuatyí cha cuenda ra Adán. ¹³Nyata ni cumañi ca cuhva Nyoo ley chi ra Moisés ta cha iyó cuatyí siqui ñuhu ñáyivi, soco ña tiin Nyoo cuenda cuatyí ñáyivi ta ni cumañi ca cuhva ra ley cuan. ¹⁴Soco nyacua nya quivi ra Adán ta nyacua nya quivi ra Moisés, chinyacā ñaha tuhun chihi chi ñu cha sacuví cuatyí, vasi ñima tahan cuatyí ra Adán cuví, cha ña quichahā ra chi Nyoo. Ta ra Adán cuví ra tari noo xiñahñu noo ra cha cua quichi.

¹⁵Soco cuatyí ra Adán ña ndiquí tahan chi chihin tumañi iñi cha chahā Nyoo chi yo. Vatyí cha cuenda cuatyí noo rayii cuan, cuaha xaan ñáyivi chihi. Soco sacacú Nyoo chi yo cha caha ri, cha cuenda noo ri rayii ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chi cuaha ñáyivi cuví.

¹⁶Cuatyí noo ri rayii ra Adán cuan, ma cuví ndiquí tahan chi chihin cha sacacú Nyoo chi yo. Vatyí cha cuenda cuatyí noo ri ra cuan, Nyoo tachí tuñi ra chi ñáyivi. Soco vityin chihin cha ñahri tyyahví yo, Nyoo sacacú ra chi yo ta sahá ra tuhun tyi vaha yo nuu ra, vasi cuaha xaan cuatyí sacuví yo. ¹⁷Ndicha vatyí quichahā nyaca ñaha tuhun chihi siqui ñuhu ñáyivi cha cuenda cuatyí noo ri rayii. Ta cha tyicuan caa chitó yo vatyí cahnu ca cuví cha vaha cha sacuví nonga ra, ra Jesucristo. Vatyí tandihi ñu cha ñihí cha vaha cha chahá Nyoo, cha cuvahā ñu nuu ra, ta iyó ñu

ñáyivi chaa chihin tunyee iñi ra Jesucristo. ¹⁸Tari cha catyí cuatyí ra Adán ta tachí tuñi Nyoo chi tandihi ñáyivi iyó siqui ñuhu ñáyivi, tyicuan caa tucu cha cuenda cha vaha cha sacuví ra Jesucristo, Nyoo saha ra tuhun tyi vaha ñáyivi nuu ra ta chahá ra noo ñáyivi vaha coo tandihi ñu. ¹⁹O cuñí chi catyí tyehe caa: Cha cuenda cha ña quichahā ra Adán cuan nu cahán Nyoo, cuaha xaan ñu chicoꝝ cuatyí ñu. Ta suri tyicuan caa tucu cha catyí cha quichahā ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰Vatyí Nyoo chahā cuenda ra ley cuan chi ra Moisés tacuhva nacoto ñáyivi tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnu ca tucahnu iñi iyó chi ra chihin yo vatyí cuñí xaan ca ra chi yo. ²¹Tari chinyacā ñaha cuatyí chi yo ta chahā chi tuhun chihi chi yo, tyicuan caa tucu nyacá ñaha tumañi iñi Nyoo chi yo vityin ta sacuvaha ra chi yo nuu ra vatyí coo yo noo ñáyivi cha ma naa ca maa cha cuenda Sutu Mañi yo Jesucristo.

Ma sacuvi ca yo cuatyí soco sacuvi yo cuhva catyí ra Cristo

6 ¿Yoso caa catyí yo vityin?
 ¿Atu cusacuvi ca yo cuatyí tacuhva vatyí sañaha Nyoo vatyí cuaha xaan tucahnu iñi iyó chi ra?
²Ma sacuvi ca yo. Yoó cha yahā ndu uvi iñi yo cuatyí yo. Tari quivi chihi cuatyí yo cuví cuan. Ta ¿yoso caa cuví sacuvi ca yo vityin? Ma cuví ca. ³¿Atu ña chitó nyoho vatyí cha

ndu iin ri yo chihin ra Cristo Jesús cha cuenda cha condutya yo? Tari quivi chihí yo chihin ra cuví cuan. ⁴Vatyi cha cuenda cha condutya yo, tari quivi cha quihvi yo chichi ñuhú iin ri chihin ra Cristo quivi chihí ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyi coo yo noo ñayivi chaa chihin ra.

⁵Ta iin ri coño ñuhu nanduvi yo chihin ra, tari quivi chihí yo iin ri chihin ra cuví cuan, ta cha tyicuan caa, cunandoto tucu yo tari nandoto ra. ⁶Ta chitó yo vatyi tandihi kuhva chiyó yo ta ityi chata ca, cha yaha chihí chi nu cruzi chihin ra Cristo, tacuhva vatyi coño ñuhu cuatyí yo ma cuvi ca cunyaca ñaha chi chi yo. ⁷Vatyi ñu cha yaha chihí, ma cuvi ca sacuvi ñu cuatyí. ⁸Ta tatu cha yaha chihí yo chihin ra Cristo, chinó iñi yo vatyi cucoo tucu yo chihin ra. ⁹Ta chitó yo vatyi cha yaha chihí ra Cristo, noo ri chaha nandoto ra, ta ma cuví ca ra. Ñahri ca tunyee iñi iyó chi tuhun chihí cha cunyaca ñaha ca chi chi ra. ¹⁰Yaha cha chihí ra Cristo cha catyi cuatyí ñáyivi, nandoto ra cha ma cuví ca maa ra. Ta vityin iyó ra cha cuenda maa Nyoo. ¹¹Ta tyicuan caa tucu maa yo, ma sacuvi ca yo cuatyí. Saha yo tuhun tyi cha yaha chihí yo cha cuenda cuatyí cuan. Soco coo yo kuhva cuñí Nyoo cha cuenda cha iin ri cuví yo chihin ra Cristo Jesús Sutu Mañi yo.

¹²Yucuan chaha yoó ma kuhva yo ityi cha cunyaca ñaha ca cuatyí chi coño ñuhu yo. Ma kuhva yo ityi chi coño ñuhu yo cha saniñi chi chi

yo cha sacuví yo noo cha ña vaha cha cuñí chi. ¹³Ma kuhva yo ityi chi coño ñuhu yo cha sacuví chi cha quiñi caa. Soco kuhva cuenda yo chi yo chi Nyoo, tari noo ñáyivi cha chihí ta nandoto. Cuhva cuenda yo coño ñuhu yo chi Nyoo tacuhva vatyi sacuvi yo cha vaha. ¹⁴Vatyi cuatyí yo ma cuvi ca chasaha chi chi yo. Vatyi ley cha tyaa ra Moisés, ña nyacá ñaha ca chi chi yo, soco cha cacu añima yo ta iyó yo cha cuenda tumañi iñi cha chahá Nyoo chi yo.

Cuví yo tari noo musu cha sacuví cha vaha

¹⁵Iyó yo cha cuenda tumañi iñi cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuvi ca yo cuatyí? Ña tahán chi. ¹⁶Nyoho chitó vaha ndo vatyi tatu cuví ndo musu noo ra, tahán chi sacuvi ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuvi yo, tari noo chitoho yo cuví cuatyí cuan, vatyi quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyi vaha yo. ¹⁷Soco tyahvi nyoo chi Nyoo, tyi nyoho nu quichi chi cuví ndo noo musu chi cuatyí vatyi quichaha ndo chi cuan. Soco vityin chihin cha nii iñi ndo quichahá ndo tuhun Nyoo cha sañahá ñu chi ndo. ¹⁸Cha yaha cunda cuatyí ndo, ta vityin ña nyacá ñaha ca chi chi ndo. Ta vityin cuví ndo noo musu cha cua sacuvi cha vaha. ¹⁹Cahín noo kuhva

cha ña yii ri chihin ndo vatyí ta cutuñi vaha ca iñi ndo tuhun Nyoo. Quiví cuan chaha cuenda ndo coño ñuhu ndo chi cha quiñi caa ta cha ña vaha vatyí sacuví ndo cha ña vaha. Vityin ñacuhva cuenda ndo coño ñuhu ndo chi Nyoo tacuhva vatyí coo ndo noo ñayiví cachi, ta maa maa ri cha vaha sacuvi ndo nuu ra.

²⁰Quiví cuví ndo musu cha quiñi caa, ña cuví sacuvi ndo cha vaha. ²¹Soco ññáá cha ñihí ndo chihin cuan? Maa ri ticahan nuu chaha cuan chi ndo. Ta ña tuví iñi ndo. Maa ri tuhun chihi ta anyaya nyisó cuan. ²²Soco vityin ña nyacá ñaha ca cuatyí chi ndo. Ta vityin cha sacuví ndo tyiño nuu Nyoo. Ta ihya ndicha tyinyeé chi chi ndo vatyí chihin ihya cuví coo ndo noo ñayiví cachi. Ta nu ndihí tuhun tyicuan ri maa cucoo ndo chihin Nyoo. ²³Cha sacuví yo cuatyí, ican cuan chahá tuhun chihi chi yo. Soco tumañi iñi cha chahá Nyoo chi yo, ican cuan cuví ñayiví cha ma naa ca maa. Ta ican cuan chahá ra ta ñahri tyiyahvi yo, cha cuenda cha iin ri cuví yo chihin ra Cristo Jesús, Sutu Mañi yo.

Ña nyacá ñaha ca ley chahnu chi ñu yihí cuenda ra Cristo

7 Yañi, nyoho ñu chitó ley cuví ndo, chitó ndo vatyí ley nyacá ñaha chi chi noo ñayiví cha ni ri ca cha iyó ñu. ²⁻³Ta cuñun, noo ñaha tandaha, catyí ley vatyí coo ña chihin yii ña nyacua nya cúvi ra. Ta tatu iyó ña chihin inga rayii cha ni ri cha iyó yii ña, chicoo cuatyí ña nuu Nyoo. Soco tatu cha yahá chihi

yii ña, ña nyacá ñaha ca ley cuenda ñu tandaha chi ña, ta cuví tandaha ña chihin inga ra, ta ma coo cuatyí ña nuu Nyoo.

⁴Ta tyicuan caa tucu nyoho yañi. Cha chihí ndo cha cuenda ley chahnu ta cuví ndo ñu cuenda ra Cristo vatyí ican ra cuví yii ndo vityin. Ta ican ra cuví ra cha nandoto, tacuhva vatyí cuví cotyiño Nyoo chi yo ta sacuvi yo cha vaha.

⁵Quiví chiyó yo cuhva cuñi coño ñuhu yo, ley chahnu cha tyaa ra Moisés, tacuhva sanaquiquí ri chi chi yo cha sacuvi yo cha quiñi caa, vatyí catyí chi tyi ma sacuvi yo. Soco sacuví yo, ta yucuan cuví cha chaha tuhun chihi chi añima yo. ⁶Soco vityin ña nyacá ñaha ca ley chahnu cuan chi yo, vatyí cha yahá chihi cha quiñi caa yo chihin ra Cristo. Ta vityin cuví sacuvi yo tyiño nuu Nyoo vatyí iyó yo ñayiví chaa cha chahá Tatyí Ii Nyoo chi yo, ta ña sacuví ca yo tari sacuví yo quiví nyicoñ xaan yo ley chahnu cuan.

Ley Nyoo, ican sañahá vatyí iyó cuatyí yo

⁷Ta vityin yoso caa, áatu ña vaha ley cuan? Ñima cha ña vaha. Vaha. Soco tyehe ta ña tuví ley cuan, ma cote ñáá cha cuví cuatyí. Ni ma cote tyi ña vaha cha quichi cuví iñi cha chii inga ñayiví, tyehe ta ña catyí ley cuan vatyí ña vaha. ⁸Tyehe ta ñahri ley cuan, ma cote ñáá cha cuví cuatyí, ta ma cuñi xain sacuvi, soco quiví cha chité ñáá cha cuví cuatyí, yucuan quiví quichí cuví xaan iñi sacuvi, vatyí naquiquí cha quiñi caa cha iyó chi.

Soco tyehe ta ñahri ley, ma coto yo tyi iyó cuatyí. ⁹Ta quiví cha ña chité ñáá tuhun cahán ley cha chaha Nyoo chi ra Moisés, chica ñi vatyí ñahri cuatyí iyó nuu Nyoo. Soco quiví chité ley cuan, ta chité vatyí tahán chi cunai nuu Nyoo vatyí iyó cuatyí. ¹⁰Catyí ley cuan tyi tatu quichahí chi chi, cucoi tyicuan ri maa. Soco cha nuu cha ñihi tahvi añime chihin ley cuan, cunaa ndíhi nuu Nyoo. ¹¹Ta cuatyí cha iyó chii, sandaví ñaha chi chii vatyí chotyíño chi ley chahnu cuan tacuhva vatyí tahán chi cunai nuu Nyoo, vatyí ña quichahí nu cahán ley cuan.

¹²Ley cha chaha Nyoo chi ra Moisés, vaha xaan, vatyí tuhun cha chaha maa Nyoo cuví, ta tandíhi cha catyí ra vatyí sacuvi yo, vaha xaan ta cuíti xaan. ¹³Ta ley vaha cuan, ¿atu ican cuan sativí chii? Ñima. Cuatyí cha sacuví, ican sativí chii, yucuan chaha tahán chi cunai nuu Nyoo. Vatyí ley vaha cuan, ican cuví cha sañahá chii vatyí cuatyí cuví cha sacuví. Ta cha tyicuan caa, sañahá ley vatyí quiñi xaan caa cha sacuví yo cuatyí.

¹⁴Ta chitó yo vatyí ley cuan, Nyoo chaha. Ta ñahri cuatyí ley cuan. Soco mai iyó cuatyí vatyí sacuví cha quiñi caa ta nyacá ñaha cuatyí cuan chii. ¹⁵Ña cutuñí ñi ñáá cha tahin. Vatyí cuñí sacuvi cha vaha, ta ña cuví sacuvi. Ta cha ña vaha cha ña cuñí sacuvi, ican cuan sacuví. ¹⁶Cuñí xain sacuvi cha vaha, soco ña cuví sacuvi, ta cha tyicuan caa tiin cuenda vatyí ley chahnu Nyoo, vaha chi. ¹⁷Ñima ca mai sacuví cha ña vaha, soco cuatyí cha iyó chii, ican cuan sacuví cha ña

vaha. ¹⁸Vatyí chité vatyí iyó cuatyí cha cuenda coño ñuhi. Yucuan chaha ñahri cha vaha sacuví, vatyí quichí cuvi ñi sacuvi cha vaha, soco ña cuví. ¹⁹Cuñí sacuvi cha vaha, soco ña sacuví ta sañihí que sacuvi cha ña vaha. ²⁰Ta tatu sacuví cha ña cuñí sacuvi, ñima ca mai sacuví, soco cuatyí cha iyó chii, ican cuan sacuví.

²¹Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví. ²²Vatyí chichi añime tahán xaan ñi ley Nyoo. ²³Soco iyó inga ley chichi coño ñuhi, ta ña tahán ñi chi cuhva cha tahán ñi añime. Ta chahá chi cha cunyaca ñaha cuatyí cha iyó chichi coño ñuhi chii. ²⁴¡Ndahvi yuhu ra ndahvi! ¿Yóo ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi? ²⁵Noo tuhun ri maa Nyoo sacacú ra chii cha cuenda ra Jesucristo. ¡Tyahvi nyoo chi Nyoo cha cuenda cuan! Ta vityin nyehí vatyí chihin añime cuñí sacuví ley Nyoo, soco coño ñuhi cuñí chi sacuví chi ley cuatyí.

Tatyí Ii Nyoo tyinyeé chi chi yo ta cuví coo yo noo ñayiví chaa

8 Soco vityin, Nyoo ma tachi tuñi ca ra chi ñu ndu ñin ri chihin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí Ii ra. ²Ta tyicuan caa tucu yuhu, Tatyí Ii Nyoo nyacá ñaha chii vityin vatyí ndachí chi chii, ta chahá chi noo ñayiví chaa coi cha cuenda cha ñin ri cuví chihin ra Cristo Jesús. Ta vityin ña nyacá ñaha ca ley cuatyí

ta tuhun chihi chii. ³Nyoo sacuvi ra noo cha ña cuví sacuvi ley cha quehen cuenda ra Moisés, vatyí ña cuví chasaha chi coño ñuhu cuatyí yo cha nyacá ñaha chi yo. Yucuan chaha Nyoo saquichí ra chi Sehe ra. Quichí ra chihin noo coño ñuhu tari maa yo, ta chihí ra cha cuenda cuatyí yo, ta sandihí ra tuhun cha nyacá ñaha cuatyí chi yo. ⁴Sacuvi Nyoo tyehe caa tacuhva cuví sacuvi yo cuhva catyí ley ra, vatyí ñima ca cuhva cuñí coño ñuhu yo iyó yo, soco iyó yo cuhva cuñí Tatyí Ii Nyoo.

⁵Vatyí ñu iyó cuhva cuñí coño ñuhu, cuhva cuñí chi chicá xiñi ñu, soco ñu iyó cuhva cuñí Tatyí Ii Nyoo, cuhva cuñí Tatyí Ii Nyoo chicá xiñi ñu. ⁶Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi cuhva cuñí Tatyí Ii. Iyó cha taxi ri ñanima ñu ta cucoo ñu ñayiví tyicuan ri maa chihin Nyoo. ⁷Ñu cha maa maa ri cuhva cuñí coño ñuhu chicá xiñi, ñu xaan iñi chi Nyoo cuví ñu, vatyí ni ña cuñí ñu ta ni ña cuví sacuvi ñu cha catyí ley ra. ⁸Yucuan chaha ñu iyó cuhva cuñí coño ñuhu, ña cuví sacuvi ñu cuhva tahán iñi Nyoo. ⁹Soco nyoho ña iyó ca ndo cuhva cuñí coño ñuhu, vatyí tatu ndicha cha iyó Tatyí Ii Nyoo ñanima ndo, iyó ndo chihin cha iin ri cuví ndo chihin Tatyí Ii Nyoo. Ñu cha yori Tatyí Ii ra Cristo ñohó ñanima, ñima ñu cuenda ra Cristo cuví chi ñu. ¹⁰Soco ñu iyó ra Cristo ñanima, nyitó ñanima ñu vatyí sanduvahá Nyoo. Soco coño ñuhu ñu chihí chi cha catyí cuatyí. ¹¹Nyoo sanandoto

ra chi ra Jesús cha yaha cha chihí ra. Ta tyicuan caa tucu nyoho, tatu iyó Tatyí Ii Nyoo ñanima ndo, cusanandoto tucu Nyoo chi coño ñuhu ndo chihin Tatyí Ii ra.

¹²Ta tyicuan caa yañi, nyaá noo cha nyaá siquí yo cha sacuvi yo, soco ñima cha sacuvi yo cuhva cuñí coño ñuhu yo. ¹³Vatyí tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyí Ii Nyoo chihin tunyee iñi ra, cuví chasaha ndo chi cha quiñi caa cha cuñí coño ñuhu ndo ta cuconyito ndo cha ndicha cuii.

¹⁴Vatyí tandihí ñu sacuví cuhva saquehén ityí Tatyí Ii Nyoo, sehe Nyoo cuví chi ñu. ¹⁵Nya quiví cha tiñ cuenda yo Tatyí Ii Nyoo ta ña yuhví ca yo chi ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chi yo na cahan yo chihin Nyoo tyehe caa: “Sutu Mañi yuhu”, catyí yo chi ra.

¹⁶Ta suri maa Tatyí Ii cuan ndu iin ri chi chihin cha chiñi tuñi yo ta sacoto chi chi yo vatyí cha cuví yo sehe Nyoo. ¹⁷Ta cha cuenda cha cuví yo sehe ra, iyó ityí chi yo cha ñihi yo cha vaha cha catyí Nyoo tyí cuhva ra chi yo, iin ri chihin ra Cristo. Vatyí tatu iin ri nyehé yo tindoho chihin ra Cristo, suri iin ri cucahnu yo chihin ra.

¹⁸Chité vatyí tindoho cha nyehé yo vityin, noo cha luhlu ri cuví cha nuu cha tyaquí cha cunyehe yo nachaa yo nuu nyaá Nyoo.

¹⁹Tandihí cha savahá Nyoo cuñí xaan chi nyehe chi, ta nyatú chi quiví cha cusañaha ra yóo cha cuví

tandihí sehe ra. ²⁰Vatyi tandihí cha savahā Nyoo tiví chi. Vasi ña cuñí chi tiví chi soco Nyoo chahā ra cha tiví chi cha cuenda cuatyi cha sacuví ñáyivi. Soco catyi Nyoo tyi coo quivi ta cunduchaa tucu chi inga chaha. ²¹Tandihí cha savahā Nyoo ta cunduchaa tucu chi inga chaha, ta ma cutivi ca, quivi cha cunasama Nyoo cuhva iyó chi vityin. Ta cucusií cuñí chi iin ri chihin tandihí sehe Nyoo vatyi ma tiví ca chi. ²²Chitó yo vatyi tandihí cha savahā Nyoo ta nyehé xaan chi tindoho. Cahnu xaan tindoho nyehé chi tari cha uhvi cha nyehé noo ñaha síhi cha cacú sehe ña. ²³Ta ñima maa ri maa chi nyehé tindoho, soco nyehé tucu yoó. Vasi cha natiin cuenda yo Tatyí Ii cha chahā quiyi Nyoo chi yo, soco cahnu xaan tindoho nyehé yo, vatyi cuñí xaan yo cha tahán ri chi quivi cha cunanduvi yo sehe ra. Vatyi cunasama ra cuhva iyó coño ñuhu yo. ²⁴Vasi ta ñihi ca yo tandihí cuan soco chitó yo tyi cuñihi yo vatyi chino iñi yo ta chihin cuan cacu yo. Tatu nyatú yo cha cutahan chi chí yo, cuñí chi catyi vatyi ta ñihi ca yo. Tatu cha yahā ñihi yo chí chí, ma cuatu ca yo. ²⁵Soco tatu yihí iñi yo cha ñihi yo noo cha ta nyehe ca yo, cuñí chi cha cuatu yo chihin cha cama iñi yo. ²⁶Ta suri tyicuan caa tyinyeé tucu Tatyí Ii chí yo chihin cha vita cuñí yo vatyi ña chitó yo yoso caa cacan tahvi yo chí Nyoo cuhva tahán chí. Ta Tatyí Ii cuan chicán tahvi chí chí Nyoo cha cuenda yo chihin noo tuhun cha ña cuví nacatyi yo. ²⁷Chitó maa Nyoo ñáá cha caá ñima yo,

ta chitó ra ñáá cha cuñí Tatyí Ii ra cacan chí, vatyi chicán chí cuhva cuñí maa ra cha cuenda ñáyivi cuenda ra.

²⁸Chitó yo vatyi ñáyivi, ñu cuñí vavaha chí Nyoo, tandihí cha cuví chí ñu ta tyinyeé chí chí ñu, vatyi maa ñu cuví ñu nacachí ra, tari cuhva tyaā ra cuhva chí ñu. ²⁹Vatyi nya quivi xihna ri, ta cha ñohó nuu Nyoo yóo cuví ñu cucunyicon chí ra. Ta tyaā ra cuhva chí ñu vatyi cucuvi ñu tari Sehe ra, ra Jesucristo, tacuhva vatyi cucuvi ra ra cha ñihi ca cha nuu tandihí ca yañi ra, ñu yihí tuhun Nyoo. ³⁰Ta ñu cha tyaā Nyoo cuhva tyi cuví ñu sehe ra, nacana tucu ra chí ñu. Ta ñu cha nacana ra, suri sacuvaha ra chí ñu nuu ra. Ta ñu cha sacuvaha ra chí, chahā ra cha cucahnu cuví ñu chihin ra.

³¹¿Ñáá cha catyi yo cha tyicuan caa? Tatu Nyoo ta nyaá ra tumañi iñi chí yo, ¿yóo cha cuví tyaā cuatyi síqui yo? Yori. ³²Nyoo ña catyi ra cha ma cuhva cuenda ra sehe ra, soco chahā cuenda ra chí ra vatyi cúvi ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chiñuhú chí yo iin ri chihin Sehe ra? Cuhva ra. ³³¿Yóo cha cuví tyaā cuatyi síqui ñu cha nacachí Nyoo? Yori. Vatyi Nyoo ican ra cuví ra saha ra tuhun tyi vaha ñu nuu ra. ³⁴¿Yóo cha cuví catyi tyi cuhun yo anyaya? Yori. Vatyi ra Cristo cuví ra chí chí cha cuenda cuatyi yo, ta nandotō ra ta vityin nyaá ra chí yo vaha ndaha Nyoo, ta chicán tahvi ra nuu Nyoo cha cuenda yo. ³⁵Ñahri cha cuví sacuachiyó chí yo

chihin cuhva cuñí xaan ra Cristo chi yo. Vatyí vasi nyehé xaan yo tindoho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihi yo, soco ma cuvi sacuachiyo tandíhi tindoho cuan chi yo chihin cuhva cuñí ra chi yo. ³⁶Vatyí tyehe caa cahán chi nu tutu Nyoo tuhun tindoho cha cunyehe yo:

Cha cuendon, Sutu Mañi yuhu,
ta cuñí cahñi ñáyivi chi ndi
tandíhi quivi.

Ta tari noo mbee cha cua cahñi
ñu, tyicuan caa sacuví ñu chi
ndi, catyí chi.

³⁷Soco vasi yahá yo tandíhi tindoho cuan, soco cucuvi vaha ca chasaha yo cha cuenda ra cha cuñí xaan chi yo. ³⁸Yucuan chaha chitó vahi vatyí ñahri maa cha cuví sacuachiyo chi yo chihin cuhva cuñí xaan Nyoo chi yo. Ni tuhun chihi, ni ñayiví iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuvi sacusiin chi chi yo chihin Nyoo. ³⁹Ni cha iyó nu sucun, ni cha iyó nu cono xaan, ni nonga cha savahá Nyoo, ma cuvi sacusiin chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

Nyoo nacachi ra chi ñu ñuu Israel

9 Cahín cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyí Tatyí Ii Nyoo ican saquehén ityi cha chíni tuñi xiñi. Yucuan chaha chitó vahi vatyí cha ndicha cahín nu catyí tyí ²cuihya xaan cuñí ta tyicuan ri uhvi cuñí añime ³cha cuenda ñu

ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa. ⁴Ta maa ñu, tata ra Israel vachi ñu. Ta Nyoo naquehén cuenda ra chi ñu tari cha sehe ra. Ta sañahá ra cuhva caá ra chi ñu, tyi cahnu xaan ra cuví ra, vatyí chinyaa ra chihin ñu. Ta natyihí tahan ra tuhun chihin ñu, ta chahá ra ley ra chi ra Moisés vatyí cuhva ra chi ñu. Ta sañahá ra cuhva cuñí ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi. ⁵Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandíhi cha iyó. ¡Na sacahnu yo chi ra tyicuan ri maa! ¡Ta na cuví chi tyicuan caa!

⁶¿Atu catyí vatyí ña sacuví Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyí ña tandíhi ñáyivi Israel cuví ñu ñu Israel cha ndicha. ⁷Ña tandíhi ñu tata ra Abraham ta cuví ñu sehe ra cha ndicha. Vatyí tuhun cha cahán maa Nyoo chihin ra, cahán chi cha cuenda noo ri sehe ra. Vatyí catyí Nyoo chi ra tyehe caa: “Cha cuenda ra Isaac sehun cucoo ñáyivi chuun.” ⁸Ihya sañahá chi yo vatyí ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandíhi ñáyivi chinó iñi tuhun catyí Nyoo tyi cusacuvi ra, ican ñu cuví ñu sehe ra cha ndicha. ⁹Vatyí cha catyí Nyoo tyi cuhva ra chi ra Abraham, ican cuví ihya: “Quivi cha tahán chi, cuquichi nu nyicú ndo ta cu Sara

cucoo noo sehe ña”, catyi Nyoo chi ra.

¹⁰Ta ñima yucuan ri. Vatyí ni nduvi sehe cu Rebeca, iin ri sutu ra, sutu chahnu yo, ra Isaac. ¹¹⁻¹²Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyi Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuvi Nyoo tyicuan caa vatyí cachí ra chi ñáyivi cha cuñí maa ra, ta ñima cha cuenda cha sacuvi ñu. ¹³Tari catyí ra nu tutu ra tyehe caa: “Cuñí que chi ra Jacob, ta chi ra Esaú ña cuñí.”

¹⁴¿Tu tyicuan caa ñáa cha cucatyí yo? ¿Atu cuví catyi yo tyi ña vaha cha sacuví Nyoo? ¡Ma cuví! ¹⁵Vatyí catyí ra chi ra Moisés tyehe caa: “Cu cundahvi cuñi yóo ñáyivi cuñí mai cundahvi cuñi.” ¹⁶Ta tyicuan caa chitó yo vatyí ma cundahvi cuñi Nyoo nyehe ra chi ñáyivi cha cuenda cuhva cuñí maa ñu, o cha cuenda cha sacuvi ñu. Soco cuhva cuñí maa Nyoo cucuvi. Vatyí maa ra cuví ra cundahvi iñi yóo chi cuñí maa ra. ¹⁷Vatyí nu tutu ra, catyi ra chi rey Egipto tyehe caa: “Sacuví rey chuun tacuhva sañahí tunyee iñi cha iyó chii chi ndo, ta tandihi ñáyivi cucoto ñu yóo ra cuví yuhu”, catyí Nyoo. ¹⁸Ta tyicuan caa Nyoo cundahvi cuñí ra yóo ñáyivi cuñí maa ra. Ta suri sandundavá tucu ra añima ñu cuñí maa ra sandundava ra.

¹⁹Ta cu catyun chii: “Tatu tyicuan caa, ¿ñáa tuhun cha tyaa Nyoo cuatyí siqui ñáyivi? Vatyí ¿yóo cha cuví nacahnu cuhva cuñí ra? ¡Yori!” ²⁰Soco ña vaha cuhva chicá iñun

cha tyicuan caa. Vatyí yori cuví catyi tyi ña vaha cha sacuví Nyoo. ¿Yóo ra cuví yoho vatyí nacahnu nu cahán Nyoo? ¿Atu cuví catyi quisi ñuhú cuan chi ñu cha savaha chi chi vatyí ña tahán iñi chi cuhva cha savaha ñu chi chi? Ma cuví.

²¹Vatyí ñu cha savahá ndaha tyiño iyó ityi chi ñu savahá maa ñu ñáa cha cuñí ñu chihin nyahyu cuan. Chihin nyahyu cuan cuví savaha ñu noo quisi finu xaan. Ta cuví savaha tucu ñu noo cha ndahvi ri.

²²Tyicuan caa tucu Nyoo, iyó ityi chi ra cha tachi tuñi ra chi ñáyivi quini iyó cha cuenda cha sacuví ñu cha ña vaha. Ta cuví sañaha ra chi ñu tyi iyó xaan tunyee iñi chi ra. Soco sanyee xaan ra iñi ra chihin ñáyivi cuan. Ta chi maa ñu tahán chi tachi tuñi ra. Ta tahán chi sanaa ra chi ñu. ²³Ta iyó tucu ityi chi ra cha saha ra tucahnu iñi chi ñu savaha maa ra vatyí sañahá ra tyi cahnu ra cuví ra. Maa ñu cuví ñu ñu cachí ra vatyí cuñihi ñu tandihi cha vaha, ta cucoo ñu gloria chihin ra. ²⁴Ta suri maa yo cuví ñu cuan. Vatyí Nyoo cana ra chi yo. Yihí yo cuví yo ñu Israel, ta yihí yo cha ñima ñu Israel cuví yo. ²⁵Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyi ñáyivi chii cuví chi ñu.

Ñu cha ña cuñi, cunacuñi chi ñu, catyí Nyoo.

²⁶Ta suri nu catyi Nyoo chi ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chi ñu: “Sehe yuhu, ra cuví Nyoo nyito, cuacuvi ndo.” ²⁷Soco

cha cuenda ñu Israel catyí ra Isafás tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu. ²⁸Vatyí Sutu Mañi yo numi ri cusacuvi ra tandihi cha catyí ra tyi cusacuvi ra siqui ñuhu ñáyivi chihin cha cachi.” ²⁹Tari catyí tucu ra Isafás ta ityi chata ca tyehe caa:

Tyehe ta Sutu Mañi yo ra nyacá ñaha tandihi cha iyó andivi, ta ma sacacu ra chi suhva yo, cunaa tandihi yo,

Tari naḡ ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

³⁰¿Tatu tyicuan caa, ñáa cha catyí yo? Ñáyivi cha ñima ñu Israel cuví, ña nanducu ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chi ra. ³¹Ta ñu Israel nyicón xaan ñu ley, tyi cuñí maa ñu tyi cuvaha ñu nuu Nyoo chihin cuan, soco ña cuví. ³²¿Ñáa tuhun? Vatyí cuñí ñu cuvaha ñu nuu Nyoo chihin cha sacuví ñu ley cuan, ta ña cuñí ñu cuvaha ñu nuu ra chihin cha chinó iñi ñu chi ra. Yucuan chaha vatyí tari cha catyihí chaha ñu chihin noo yuu cuví chi cuan. ³³Yuu cuan cahán Nyoo tuhun nu tutu ra tyehe caa:

Ñuu Sión, yucuan tyaḡ chi noo rayi cha cuví tari noo yuu.

Noo yuu cha sanduvá chi ñáyivi cuví ra.

Soco ñu chinó iñi chi ra ma cucahan nuu ñu, catyí Nyoo nu tutu ra.

10 Yañi, cuñí xain chihin cha tandihi añime cha cacu

ñu Israel. Ta cha chican tahvi xain cha cuenda ñu. ²Cha ndicha cuví vatyí cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví ñu. ³Vatyí ña chitó ñu yoso caa sacuvahá Nyoo chi ñáyivi nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu. ⁴Vatyí ra Cristo cha quichi ra ta sacuví ra tandihi cha catyí ley, ta sacuví ra vatyí tandihi ñu chinó iñi chi ra, cuvaha ñu nuu Nyoo.

⁵Catyí ra Moisés vatyí cuví cuvaha ñáyivi, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandihi cha catyí ley, coo ñu noo ñáyivi cha ma naa ca maa.” ⁶Soco cha cuvaha yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyí cuñí chi cha cundaa noo ra andivi ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyí cha yahḡ quichi ra Cristo. ⁷Ni ma caca xiñun vatyí cuñí chi cha cunoo noo ra chichi ñuhú vatyí sanandoto ra chi ra Cristo, vatyí cha yahḡ nandoto ra. ⁸Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichi ra Cristo ta nandoto ra. Ican cuví tuhun cha tahán chi chinó iñi yo. ⁹Tatu chihin yuhun catyún vatyí ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha yahḡ chihí ra, cucacu

añimon. ¹⁰Vatyí chihin añima yo cuñí chi chino iñi yo chi ra Cristo tacuhva cuvi cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo. ¹¹Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.” ¹²Vatyí Nyoo iin ri cuhva nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandíhi yo. Ta nasocó xaan ra chi tandíhi yo cha chicán tahvi yo chi ra. ¹³Vatyí tyehe caa catyí tuhun Nyoo: “Tandíhi ñu cha chicán tahvi chi ra Jesús cucacu añima ñu.” ¹⁴Soco ýoso caa cucacan tahvi ñu chi ra tatu ta chino ca iñi ñu chi ra? Ta ýoso caa cuchino iñi ñu chi ra tatu ta cuiñi ca ñu tuhun ra? Ta ýoso caa cuiñi ñu tuhun ra tatu ta yori ca cahán tuhun ra chihin ñu? ¹⁵Ta ýoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cahán tuhun vaha nuu ñáyivi.”

¹⁶Soco ña tandíhi ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuñí chino iñi tuhun cahán ndi”, catyí ra. ¹⁷Yucuan chaha cha chiñí xihna yo tuhun ra Cristo, tyicuan ta chino iñi yo chi ra.

¹⁸Soco ndacá tuhin ihya: ¿Atu ña chiñí ñu Israel tuhun Nyoo? ¡Chiñí ñu! Vatyí nu tutu Nyoo catyí chi tyehe caa:

Sutu Mañi yuhu, cha sacotó ñáyivi tuhun maun nicahnu síqui ñuhu ñayivi, catyí chi nu tutu Nyoo.

¹⁹Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaá ra tuhun cahán Nyoo chihin ñu Israel tyehe caa:

Nyoho, cucuquiñi cuñi ndo vatyí cucuhve cha vaha chi noo ityi ñáyivi cha ñima ri tuhun, ñáyivi cha ña cutuñí iñi.

Ta cunaquiqui tisihi ndo nyehé ndo chi ñu, catyí Nyoo.

²⁰Ta ra Isaías cañá iñi ra catyí ra tyi ñu cha ña nanducú chi Nyoo, nañihí ñu chi ra. Ta sañahá ra chi ra chi ñu cha ña ndacá tuhun tuhun ra. ²¹Ta tyaá tucu ra Isaías tuhun cahán Nyoo chihin ñu Israel tyehe caa: “Ndiyaca cané chi ñáyivi chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyí Nyoo.

Yihí ñu Israel cha ñihí ñu cuhva cacu añima ñu

11 ¿Atu ña cuñí ca Nyoo chi ñu Israel? Ñima cha ña cuñí ca ra chi ñu, vatyí suri ra Israel cuví tucu yuhu. Vatyí tata ra Abraham ta tata ra Benjamín cuví. ²Nyata cha naha cachí Nyoo chi ñu Israel tacuhva cuvi ñu ñáyivi chi ra. Ta vityin ñima cha sacuachiyó ndíhi ra chi ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa: ³“Sutu Mañi yuhu, chahñí ñu chi ra cuví profeta maun, ta sataní ñu arta vehe ñuhu maun. Noo tuhun ri ca mai ndoo,

ta cuñí ñu cahñi ndihi ñu chii”, catyí ra. ⁴Soco nacahān Nyoo ta catyí ra chi ra Elías: “Ñima maa ri maun ndoo. Ucha ca mil ñáyivi naquehen vahi cha ña chicuñi chiti ñu nuu xitohyo nyoo Baal”, catyí Nyoo chi ra. ⁵Ta suri tyicuan caa vityin, ndoo suhva ñu sacahnú chi Nyoo. Ican ñu nacachi Nyoo chii tyi cusaha ra tucahnu iñi chi ñu. ⁶Vatyí cha cuenda cha vaha ñáyivi cuví Nyoo ta sahá ra ticahnu iñi chi yo. Tyehe ta chihin cha vaha ñáyivi cuví maa yo ta sahá Nyoo tucahnu iñi chi yo, cuñí chi catyí tyi ñima ca chihin cha vaha maa ra ta sacacú ra chi yo.

⁷Ta ¿yoso caa? Ñu Israel nanducu xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachi maa Nyoo chii, ñihí ñu cuan cuhva. Ta inga ñu Israel cuan ndundava xaan aña ñu. ⁸Tari catyí nu tutu Nyoo tyehe caa: “Nyoo chahā ra noo cuhva chi ñu cha ma cutuñi iñi ñu. Ta chahā ra chiti nuu cha ña cutuñí iñi ñu cha nyehe ñu. Ta chahā ra soho ñu soco ña cutuñí iñi ñu cha chiñi ñu, ta nyacua nya vityin ta tyicuan caa ñu.” ⁹Ta suri catyí tucu ra David tyehe caa:

Sii xaan cuñí ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹Ta vityin ndaca tuhin ihya: ¿Atu cha cuenda cha ña quichahā ñu Israel cuan nu cahán Nyoo, ta ndoo ri maa ñu cha ma cacu ca aña ñu? Ñima. Vatyí cha cuenda cha ña quichahā ñu chi ra cha saquichi Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñí ñu Israel vatyí nachino iñi inga ñáyivi. Ta cha tyicuan caa ta cuquichi cuvi tucu iñi ñu cha cacu aña ñu.

¹²Tatu cha cuenda cha ña quichahā ñáyivi Israel cuhva cha chahā Nyoo chi ñu, cuví chi cha vaha cha cuenda tandihí ca ñáyivi, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quivi cundihvi tucu ñu Israel cuenda Nyoo inga chaha. Yucuan quivi, vaha xaan ta tyaqui xaan cucuvi.

¹³Ta iyó suhva cha cuñí catyí chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyivi cha ñima ñu Israel cuví. Ta chité vatyí niñi xaan cuví tyiño cha chahā maa Nyoo chii. ¹⁴Ta cuñí tiqui vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuvi iñi tucu suhva maa ñu sacuvi ñu tyicuan caa. Ta tyicuan caa ta cacu aña ñu. ¹⁵Vatyí cha cuenda cha ña natiñ cuenda Nyoo chi ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuvi quivi cunatiñ cuenda tucu ra inga chaha chi ñu Israel, cucuvi tari cha cunandoto ñu nu chihí ñu.

¹⁶Tatu vaha noo pan cha savaha yo cha xihna ri chihin yuchan pan cuan, vaha tandihi ca yuchan cuan. Ta tatu vaha yoho noo yutun, tandihi ca soco tun, ta vaha. Ta tyicuan caa tucu ñu Israel, cuñí Nyoo chi ñu cha cuenda cha vaha ra cha vachi ñu tata.

¹⁷Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chi suhva ñu vatyí ña chino ñi ñu chi ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu ñi ri ndo chihin tu olivo Nyoo ta naquehén ndo tandihi cha vaha cha iyó chi ra. ¹⁸Soco ma saha ndo tyi vaha ca ndo ican saha inga ñu cha cuví soco tu olivo cha chahnya Nyoo. Vatyí tatu cuñí maa ndo tyi vaha ca ndo, cuñí chi nicohon ñi ndo vatyí ñima maa ndo nyisó ndo chi yoho yutun cuan, soco maa yoho yutun cuan nyisó chi ndo.

¹⁹O catyí ndo: “Ican, soco chahnya Nyoo soco yutun cuan tacuhva nicunyaa maa ndi chaha tun.”

²⁰Vaha. Soco chahnya Nyoo soco cuan cha cuenda tyi ña chino ñi ñu chi ra. Ta nyoho nicunyaa ndo yucuan, soco cha cuenda cha chinó ri ñi ndo chi ra. Yucuan chaha ma sacahnu ndo chi ndo, soco saha ndo cuenda chi ndo. ²¹Vatyí tatu ña saha Nyoo ticahnu ñi chi ñu cha cuví soco vaha cuan, ni chi nyoho ta ma saha ra ticahnu ñi tatu ña chinó vaha ñi ndo chi ra. ²²Nyehe yoso cha vaha Nyoo, soco tyicuan tucu

xaan ra chihin ñu cha ña natiñ cuenda tumañi ñi chahá ra. Soco chihin nyoho, vaha xaan ñáyivi cuví ra. Soco cuñí chi cha naquehén vaha ndo tumañi ñi cha chahá ra vatyí tatu ña naquehén vaha ndo, cucahnya tucu ra chi nyoho. ²³Soco tatu nachino tucu ñi ñu Israel inga chaha, cu nicunyaa tucu ñu nu coyó ñu. Vatyí Nyoo iyó tunyee ñi chi ra cha natyatahan tucu ra chi ñu cuan inga chaha. ²⁴Vatyí tatu nyoho cha ñima ñu Israel cuví ndo, ta quehen Nyoo chi ndo cha cuví ndo tari soco noo yutun olivo cuhu, ta natyaa tahan ra chi ndo chihin tu olivo vaha cha cumí ra, ita nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chi ñu inga chaha chaha tu olivo nu coyó ñu!

Nu ndihi ta cucacu tucu ñu Israel

²⁵Vatyí yañi, cuñí cha coto ndo noo tuhun xehe cha sacuví Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava ñi ñu suhva quivi, nyacua nya cha cuví nachino ñi inga ñáyivi chi Nyoo. ²⁶Ta cha yaha quihvi inga ñu cuenda Nyoo, tyicuan ta tandihi ñu Israel cucacu ñi ñu, vatyí nu tutu Nyoo catyí chi tyehe caa:

Ra cha cusacacu chi ñáyivi, ityi Sión cuquichi ra.

Ta cusacanyaha ra cuatyí cha iyó chi ñáyivi chi ra Jacob.

²⁷Ta ihya cuví tuhun cha cunatyihí tahin chihin ñu, quivi na sacuachiye cuatyí ñu, catyí Nyoo nu tutu ra.

²⁸Cuxaán xaan ñu Israel chihin Nyoo cha cuenda tuhun vaha ra

Cristo cha cacu añima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyí cachino iñi ra chi ra quivi cachiyo ra, ta yucuan chaha cachí ra chi ra. ²⁹Vatyí noo cha cha yaha chaha Nyoo ña natinyaá ra. Ni ña ndu uvi iñi ra cha yaha nacana ra chi yo. ³⁰Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahvi cuñí ra nyehé ra chi ndo cha cuenda vatyí ñu Israel nacahnú ñu nu cahán ra. ³¹Nacahnú ñu nu cahán Nyoo vityin tari nacahnú maa ndo quivi cuan. Ta tari cundahvi cuñí Nyoo nyehé ra chi ndo vityin, tyicuan caa tucu cucundahvi cuñi ra nyehe ra chi ñu Israel ñandíhi. ³²Vatyí Nyoo chaha ra ityi chi tandíhi ñáyivi cha nacahnú ñu nu cahán ra, tacuhva vatyí cundahvi cuñi ra nyehé ra inuu ri chi tandíhi yo.

³³iÑana cha cahnu cuví cha tyayíi Nyoo! iÑana cha vaha cha chitó xaan ra, ta cha chíni tuñi ra! Ma cuvi nacatyí yo cuhva chicá iñi ra, ni ma chaa yo cutuñi iñi yo cuhva sacuví ra. ³⁴Vatyí çyóo cha cutuñi iñi cuhva chicá xiñi Sutu Mañi yo? ¿O yóo cha sañahá chi ra? Yori. ³⁵Vatyí yori cha cuví cuhva xihna ca noo cha vaha chi Nyoo ta cha cuenda cuan ta quíhi iñi ñu vatyí na cuhva tucu Nyoo chi ñu. ³⁶Vatyí tandíhi maa cha iyó, maa Nyoo savaha, ta chino chi ta iyó chi cha cuenda ra. iCahnu xaan ca cuví Nyoo tyicuan ri maa! Ta na cuvi chi tyicuan caa.

**Na coo yo noo ñáyivi cha
sacuvi yo cuhva cuñí Nyoo**

12 Yucuan chaha yañi, chacú ndahvi nuu ndo cha cuenda

cha ndahvi cuñí Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyí yucuan cuví cuhva tiin cuenda ra cha sacahnú yo chi ra. ²Ta ma coo ca yo cuhva iyó ñáyivi iyó síqui ñuhu ñáyivi ihya. Soco na nasama yo cuhva iyó yo chihin cha nduchaá cuhva chicá xiñi yo. Ta tyicuan caa ta coto yo yoso cuhva cuñí Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndíhi cha tahán chi sacuvi yo.

³Nyoo, cha catyi cha vaha ñáyivi cuví ra, ta tyatyíño ra chíi vatyí cuvi apóstol chi ra, yucuan chaha catyí chi tandíhi nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chaha Nyoo chi ndo iin ri chihin cha chinó iñi ndo chi ra. ⁴Vatyí cha noo coño ñuhu, cuaha xaan cuhva iyó chí, ta ña iin ri maa tyíño saha chí. Chíti nuu yo, noo tyíño sahá chí, ta soho yo inga tyíño sahá chí. ⁵Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha iin ri cuví yo chihin ra, ta iin ri cuví yo chihin tahan yo. Tari cha noo ri coño ñuhu cuví tandíhi ri yo.

⁶Siin siin tyíño chaha Nyoo chi yo, yoso cuhva cha cuñí maa ra cuhva ra chi noo noo yo. Ta cuñí chí cotyíño vaha yo cha vaha cuan. Tatu chaha Nyoo cha vaha cha sahá yo profetizar, na chino iñi yo tyi ican cuan chaha ra chi yo, ta na naquehen yo tuhun sacoto ra chi

yo ta nacatyí yo chi ñáyivi. ⁷Tatu chaha ra cha vaha cha sacuví yo tyiño nuu inga ñu, cuñí chi sacuví vaha yo. Tatu chaha ra cha cuví sañaha yo chi inga ñu, cuñí chi cunyaa yo tyiño cuan. ⁸Tatu chaha ra cha cuví cuhva yo tuhun chi ñáyivi na ndu nii iñi ñu, cuñí chi cunyaa yo tyiño cuan. Ta ñu cha chaha Nyoo xuhun chi, cuñí chi cuhva ñu chihin cha nii iñi ñu. Tatu chaha Nyoo cha saquehen ityun chi ñu yihí cuenda ra, chihin cha nii iñun sacuvun. Tatu chaha Nyoo cha tyinyeé yo chi ñu chiñuhú cha chiñuhú chii, cuñí chi sacuví yo chihin cha sii cuñí yo.

Nu catyí ra Pablo yoso caa sacuvi yo cha yihí yo cuenda ra Cristo

⁹Cuñi ndo chihin cha ndicha chi tahan ndo. Ta cütasi cuñi ndo chi cha ña vaha. Ta cunyicon ndo cha vaha. ¹⁰Cuñí chi cha cuñí ndo chi tahan ndo cuenda Nyoo tari cha tahan ndo cha iin ri sihi iin ri sutu ndo. Ta quichaha ndo chi ñu ta saha ndo ñáyivi chi ñu.

¹¹Sañiñi ndo iñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha nii ñanima ndo.

¹²Sii cuñi ndo coo ndo ñáyivi, vatyí chitó ndo vatyí cucoo ndo chihin Nyoo nu cuahan ca chi. Sañyee ndo iñi ndo tatu nyehé ndo tindoho. Ta ma sandihi maa ndo cha cacan tahvi ndo chi Nyoo nyita ri.

¹³Tyinyee ndo chi ñu yihí cuenda Nyoo chihin ñáá cha chiñuhú chi ñu. Vaha tyiñuhu ndo chi ñu chaa vehe ndo.

¹⁴Vaha cahan ndo siqui ñu cha cahán chi ndo. Ta ma soco ndo chi ñu. Cacan tahvi ndo cha cuenda ñu nuu Nyoo tacuhva na nasoco ra chi ñu.

¹⁵Cusii cuñi ndo chihin ñu sii cuñí, ta cuacu ndo chihin ñu chacú chaa cha cuihya cuñí ñu.

¹⁶Iin ri cuvi ndo chihin tahan ndo. Ta ma cahnu saha ndo chi ndo. Inuu ri saha ndo chi ndo chihin ñu ndahvi. Ma saha ndo cha chitó xaan ndo.

¹⁷Ma sacuvi ndo cha ña vaha chihin ñu sacuví cha ña vaha chihin ndo. Soco saníñi ndo sacuvi ndo cha vaha nuu tandihi ñáyivi.

¹⁸Sañiñi ndo cha coo taxi ri ndo chihin tandihi ñáyivi. ¹⁹Yañi luhli, tatu yóo cha sataşí iñi chi ndo, ma tachi tuñi ri maa ndo chi ñu, soco saña ndo ta natyaa ndo ndaha Nyoo na tachi tuñi maa ra chi ñu. Vatyí nu tutu Nyoo catyí chi tyehe caa: “Yuhu tahán chi tachi tuñi, yuhu cutiyiahvi chi ñu”, catyí Sutu Mañi yo. ²⁰Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutyá, cuhva coho ra. Vatyí cha sacuvún tyehe caa, sacuvún cha nyacua nducuaha soho ra chihin ticahan nuu.” ²¹Ma cuhvon cha cunyaca ñaha cha ña vaha chuun, soco saníñun ta cuvi chasahun chi cha ña vaha chihin cha sacuvún cha vaha.

13 Tandihi ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuví tyiño cha ñima Nyoo tyaş tyiño chi ra. Ta ra cuví tyiño cha iyó, maa Nyoo tyiso chi ra.

²Yucuan chaha, ñu cha ña quichahá chi ra cacuví tyiño, cuñí chi catyi vatyí ña quichahá ñu cuhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu. ³Vatyí ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá ra vatyí tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún. ⁴Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyí ña nyaá ri maa ra, soco nyaá ra vatyí tachi tuñi ra chi ñáyivi cha sacuví cha ña vaha, vatyí tyiño cuan tyaa Nyoo chi ra. ⁵Yucuan chaha niñi cuñí chi cha quichaha ndo chi ra cacuví tyiño, ñima cha cuenda cha yuhví ndo coto tachi tuñi ra chi ndo, soco cha cuenda vatyí chitó ndo tyi tyicuan caa tahán chi sacuví ndo. ⁶Ta siin ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyí yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

⁷Cuhva ndo cha tahán chi chi minoo minoo ñáyivi. Tyiyahví ndo cha cuenda ñáa cha tahán chi tyiyahví ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi. ⁸Ma coso yica ndo chi ni noo ñáyivi. Soco

cuñi ndo chi tahan ndo, vatyí tatu cuñí ndo chi tahan ndo sacuví ndo tandihi cha catyí ley Nyoo cha tyaa ra Moisés vatyí sacuví yo. ⁹Catyí ley Nyoo tyehe caa: “Ma coo inga ñusihi o rayii chuun tatu ñima ñasihun o yiun cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuvi iñun cha chii ñáyivi.” Tatu ndicha cha cuñún chi tahan, tari cha cuñún chi maun, sacuví tucun tandihi ihya ta tandihi ca inga ca ley. ¹⁰Tatu cuñún chi tahan, ñahri cha ña vaha cua sacuvun chi ñu. Chihin cha cuñí yo chi tahan yo, sacuví yo tandihi cha catyí ley Nyoo cha tyaa ra Moisés.

¹¹Chihin tuhun ihya saha yo cuenda quivi iyó yo. Vatyí cha cha chi cuhva cha ndoyo yo ta ma cundihñi yo. Vatyí quivi nachino iñi yo chi ra Cristo, naha xaan ca nyaá quichi quivi cucacu ndihi ñima yo, soco vityin cha cuyatyin. ¹²Cha cua yaha cha cha cuaa. Ta cha cua cundichin. Yucuan chaha cuñí chi sandihi yo cha sacuvi yo cha sacuví ñu iyó nu ñaa iñi. Ta tahán chi sacuvi yo cuhva sacuví ñáyivi iyó nu ndichin. ¹³Cachi cuñí chi coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihi xaan ñu ndixi. Ta ni ma coo yo chihin savaha ri ñusihi o rayii. Ni ma coo viciu chi yo. Ta ma cutasi cuñi yo nyehe yo chi tahan yo. Ta ma nyiyo iñi yo nyehe yo chi ñu. ¹⁴Soco coo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihvi noo yo. Ta ma quihñi iñi ndo cha sacuvi ndo cuhva cuñí coño ñuhu ndo.

Ma cahan nyaun chi tahun

14 Tatu noo ñáyivi yihí cuenda Nyoo ta chiin ri chinó iñi ñu chi ra, ña vaha cha ma tiin cuenda ndo chi ñu. Vaha natiiin cuenda ndo chi ñu soco ma cuvi yuhu ndo chihin ñu siqui tuhun cha chicá uvi iñi ñu. ²Vatyí yihí ñáyivi cuñí maa ñu vatyí cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu. ³Soco ñu chachí tandihí cuan, tahán chi cha tiin cuenda ñu chi ñu cha chachí yucu ri. Ta ñu chachí yucu ri, ma cahan nyaa ñu chi inga ñu cuan. Vatyí Nyoo tiin cuenda ra chi ñu cuan. ⁴Vatyí zyóó ñu cuví yoho vatyí cahan nyaun chi ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chi ñu chihin ñu. Ta vaha cuquita ñu vatyí Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵Inga tucu cuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñí maa ñu vatyí inuu ri tandihí quivi. Tahan tahan yo cuñí chi coto vaha yo yoso cuhva chicá xiñi yo. ⁶Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo

tyi chahá ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo. ⁸Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehén cuenda ra añima yo. Yucuan chaha tatu iyó yo, o chihí yo soco chi Sutu Mañi yo cuví chi yo. ⁹Vatyí ra Cristo chihí ra ta nandotó tucu ra vatyí tacuhva cunyaca ñaha ra chi ñu nyitó ta chi ñu chihí.

¹⁰Soco yoho, ¿ñáá tuhun cha nyehé nyaun chi yañun? ¿O ñáá tuhun cha ña natiiin cuendon chi ra? Vatyí tandihí yo cutahan chi cucuhva cuenda yo chi yo nuu Nyoo vatyí cutuñi chi yo nuu ra.

¹¹Vatyí nu tutu Nyoo catyí chi tyehe caa:

Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuiñi chiti ñu nui.

Ta tandihí ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihí ñáyivi, catyí Nyoo.

¹²Yucuan chaha noo noo maa yo ta cunacuhva yo cuenda cha sacuví yo chi Nyoo.

Ma sanacavon nu cuatyí chi yañun

¹³Yucuan chaha, ña tahán ca chi cahan nyaa yo chi tahan yo. Soco nducu yo cuhva cha ma sanacava yo chi ñu nu cuatyí coto sandihí

ñu tuhun cha chino iñi ñu. ¹⁴Yuhu chité vatyi ñahri cha ma cuvi cachi, vatyi chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha. ¹⁵Soco tatu cha cuenda cha chachún ta quiñi cuñi yañun, ña ndicha cha cuñún chi ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyi ra Cristo chihí ra cha cuenda ñu. ¹⁶Ma cuhva ndo cha cahan ña vaha ñu siqui noo cha chaha Nyoo ityi chuun tyi cachun. ¹⁷Vatyi cha nyacá ñaha Nyoo chi yo cuví chi noo cha cachi coo yo nuu ra. Cusií cuñi yo ta taxi ri cuñi añima yo cha cuenda Tatyí li Nyoo cha nyaá añima yo. Ta ña niñi tuhun cha chachi yo o cha chihi yo. ¹⁸Ñu sacuví tyiño nuu ra Cristo tyehe caa, sií cuñi Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

¹⁹Yucuan chaha cuñi chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo. ²⁰Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyi tandihi cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu. ²¹Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuví yo nu chinó iñi ñu

chi Nyoo. ²²Tatu chinó iñun vatyi cuví cachun tandihi, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sií xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo. ²³Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyi ña chinó vaha iñi ñu tyi cuví cachi ñu. Ta tandihi cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

Na sacuvi yo cha tahan iñi tahan yo, ta ñima cha tahan iñi ri maa yo

15 Yoó cha ñihi nyaá yo chihin Nyoo, cuñi chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahan iñi ri maa yo. ²Tahan tahan yo cuñi chi cha sacuvi yo cuhva tahan iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo. ³Vatyi ni ri ra Cristo ña sacuví ra cuhva tahan iñi maa ra, soco cuví chi ra tari catyí nu tutu Nyoo tyehe caa: “Tandihi cha cahán ñáyivi chi Nyoo, chi ra Cristo cahán ñu”, catyí chi. ⁴Vatyi tandihi cha chicunyaá nu tutu Nyoo ta ityi chata ca, chicunyaá chi cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi añima yo cha cuenda cha sacuahá yo nu tutu Nyoo. ⁵Ta Nyoo ican ra chahá cha cama iñi yo, ta chahá ra cha vaha cuñi añima yo. Na tyinyee ca ra chi yo cha coo yo chihin cha iin ri cuví yo chihin tahan yo tari cuhva iyó ra Cristo Jesús. ⁶Vatyi tacuhva tandihi

yo iin ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

**Ñáyivi ñima ñu Israel cuví,
cucuñi ñu tuhun Nyoo**

⁷Yucuan chaha tiin cuenda vaha yo chi tahan yo tacuhva vatyí sacahnu yo chi Nyoo tari tiin cuenda vaha ra Cristo chi maa yo cha cuenda vatyí sacahnú ra chi Nyoo. ⁸Vatyí catyí yuhu chi ndo vatyí ra Cristo quichi tyinyee ra chi yo cha cuví yo ñu Israel, tacuhva sacuvi ra cha catyí Nyoo chi sutu chahnu yo tyi cusacuvi ra. Ta tyicuan caa ta sañahā ra Cristo vatyí Nyoo sacuví ra cha catyí ra tyi sacuvi ra. ⁹Ta quichi tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chi Nyoo, vatyí Nyoo ndahvi cuñí ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihi ityi ñu iyó siqui ñuhu ñáyivi.

Ta cucate yaa cha cuenda cha sacahní chuun nuu ñu, catyí chi.

¹⁰Ta inga tucu nu catyí chi nu tutu Nyoo tyehe caa:

Cusiñi cuñi nyoho ñu cha ñima ñu Israel cuví.

Cusiñi cuñi ndo chihin ñu Israel cha cuví ñu ñáyivi cuenda Nyoo.

¹¹Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañi yo, nyoho ñu cha ñima ñu Israel cuví.

Tandihi ñáyivi sacahnú ñu chi ra cha cuenda cha cahnu xaan cuví maa ra.

¹²Tyaa tucu ra Isafas nu tutu Nyoo tyehe caa:

Cucacu minoo ra vachi tata ra Isaí.

Cuquichi ra vatyí cunyaca ñaha ra chi ñu cha ñima ñu Israel cuví.

Ta maa ñu cuquihí iñi ñu chi ra vatyí cusacacu ra chi ñu.

¹³Nyoo ican ra chahá tunyee iñi chi yo ta chitó yo tyi cuhva ra cha cuhva ra chi yo. iNa sacutu ra chi ndo chihin tusii iñi! Ta coo cha taxi ri cuñí añima ndo cha cuenda cha chinó iñi ndo chi ra, tacuhva vatyí chihin tunyee iñi Tatyí li ra ta quihí vaha iñi ndo cha cucuhva ra chi ndo.

¹⁴Yañi luhli, chitó vahi vatyí nyoho vaha xaan ñáyivi cuví ndo ta chitó ndo tandihi, ta chitó vaha ndo cuhva ndo tuhun chi tahan ndo. ¹⁵Soco nu carta ihya ñihi xaan cahín siqui tandihi tuhun cha tyai, tacuhva cha ma naa iñi ndo. Tyehe caa sacuví cha cuenda tyi Nyoo chahā ra tumañi iñi chii ¹⁶cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra añima ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyí cha ndundi ñu nuu ra cha cuenda Tatyí li ra.

¹⁷Cha cuenda cha nacuhva cuende chii chi ra Cristo Jesús, yucuan cuenda cuví cusii cuñi ta

chité tyi vaha quitá tyiño sacuví nuu Nyoo. ¹⁸Vatyí ña cañá iñi cahin cha ña nyehi. Soco nacatyí cha sacuví ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuví quichaha ñu chi Nyoo. Ta ihya ndicha cha cahín. ¹⁹Vatyí chihin seña ta milagru ta chihin tunyee iñi Tatyí Ii ra sacuví ra. Ta tyicuan caa cahín tuhun cha cacu añima ñu sahá ra. Quichahí nya Jerusalén ta tandihi ityi ta nyacua nya Ilírico. ²⁰Ta tyicuan caa saniñi cahin tuhun cha cacu añima yo maa maa ri nu ta cuiñi ca maa ñáyivi tuhun ra Cristo, tacuhva vatyí ma saha tyiñe nu quichaha saha tyiño inga ra. ²¹Tari catyí nu tutu Nyoo tyehe caa:

Cucoto ñáyivi cha ta coto ca maa tuhun ra.

Ta cucutuñi iñi ñu cha ta ñaha ca maa cuiñi tuhun ra, catyí chi.

Nu tyaá ra Pablo cuhva cha cuhun ra ñuu Roma

²²Yucuan chaha ña cuví maa tuhun cha cuhin cunyehi nu nyicú ndo, vasi cuaha xaan chaha cuñi cuhin. ²³Soco vityin cha ndihi tyiño sahi ityi ñuu ihya. Ta cha cuaha xaan cuiya cuñi cuhin cunyehi nu nyicú ndo ta cunyai suhva quívi chihin ndo. ²⁴Nyehí tatu cuhin cunyehi nu nyicú ndo quívi cuhin España. Ta cha yaha cha cunyehi chi ndo, nyehi tatu cuví tyinyee ndo chii ta cuchaa ndihi nu cuahin. ²⁵Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan. ²⁶Vatyí ñu vehe

ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén. ²⁷Tyehe caa quichi cuví iñi ñu sacuví ñu. Ta ndicha vatyí tahán chi sacuví ñu. Vatyí tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu. ²⁸Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo. ²⁹Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chii.

³⁰Yañi, chacú ndahvi nuu ndo na cu ñin ri ndo chihin, chihin tindocho cha nyehí, ta çacan tahvi ndo chi Nyoo cha cuende vatyí cuñi ndo chi Sutu Mañi yo Jesucristo, ta vatyí chahá Tatyí Ii Nyoo cha cuñi ndo chii. ³¹Çacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natiin cuenda vaha ñu. ³²Vatyí tatu Nyoo ta cuñi ra, chihin cha siñ cuñi quichi nyehi chi ndo ta cuví nyitati ñin ri chihin ndo. ³³Ta Nyoo ra chahá cha taxi ri coo añima yo, na cunyaa ra chihin tandihi ndo. Ta ñacuví tyicuan caa.

Nu sacuhún ra Pablo nocumi chi ñu amigo ra

16 Sacoté chi ndo cha cuenda hermana Febe vatyí tyinyée

xaan ña chi ñu yihí cuenda Nyoo ñuu Cencrea. ²Tiïn cuenda vaha ndo chi ña tari tiïn cuenda Sutu Mañi yo, tari tahán chi sacuvi ñu yihí cuenda Nyoo. Ta tyínyee ndo chi ña chihin tandihi cha chiñuhu chi ña, vatyí cuaha xaan ñu tyínyee ña chi, ta chi yuhu ñandihí.

³Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús. ⁴Chahnyá iñi ñu ñáyivi ñu quivi cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandihí tucu ñu cha ñima ñu Israel cuvi, ta yihí tucu ñu cuenda Nyoo. ⁵Cuhva tucu ndo nocumi chi ñu yihí cuenda Nyoo cha candú iin ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya. ⁶Cuhva ndo nocumi chi cu María. Sahá tyiño xaan ña nu nyicú ndo. ⁷Cuhva ndo nocumi chi ñu ñui, ra Andrónico ta ra Junias, ra tahin cha ñohó chihin vehe caa. Cahnu tyiño casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸Cuhva ndo nocumi chi ra Amplias ra tahin cuenda Sutu Mañi yo. ⁹Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí. ¹⁰Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo

ñandihí. ¹¹Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo. ¹²Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo. ¹³Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi. ¹⁴Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra. ¹⁵Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihí ñu cuenda Nyoo cha nyicú chihin ñu.

¹⁶Ñacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷Yañi, chacú ndahvi nuu ndo, na saha ndo cuenda chí ñu cuñí sasiin chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan. ¹⁸Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu. ¹⁹Tandihí ñáyivi chitó yoso caa quichahá vaha ndo chí Nyoo. Yucuan chaha cusii xaan cuñí chihin ndo, ta cuñí vatyí natyihí

tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha. ²⁰Nyoo ra iyó tandihí cha taxi ri añima, numi ri cuhva ra cha saha ganaa ndo chi ra ña vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chi ndo.

²¹Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chi ndo.

²²Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñin ri yihí yo cuenda Sutu Mañi yo.

²³Saquichí ra Gayo nocumi chi ndo ñandihí. Vehe ra nyaí suri ihya ndú ñin ri ndi tandihí ñu yihí cuenda Nyoo. Ra Erasto ra cuví tesorero ñuu ihya, saquichí ra nocumi chi ndo, ta yañi yo ra Cuarto ñandihí.

²⁴Na cocumi Sutu Mañi yo Jesucristo chi tandihí ndo. Ta na cuvi chi tyicuan caa.

**Nu ndihí cahán ra Pablo ta
sacahnú ra chi Nyoo**

²⁵Ta vityin na sacahnu yo chi Nyoo, vatyi maa ra cuví ra cucuhva cha cunihí iñi ndo, ta ma sandihí ndo cha chinó iñi ndo tuhun ra cha sacacú ra añima yo. Ican cuví tuhun cahín ta tuhun cha sañahí cha cuenda ra Jesucristo. ñin ri cuví chi chihin tuhun cha ñohó xehe ta cha naha nyata ni cumañi chino ñuhu ñayivi. ²⁶Soco vityin sañahá Nyoo chi yo cha cuenda tutu cha casandoo ra profeta, ra cachaha cuenda tuhun ra ta cha naha. Catyí Nyoo, ra iyó tyicuan ri maa, tyi vityin tahán chi coto tandihí ñáyivi tacuhva chino iñi ñu chi ra ta quichaha ñu tuhun cahán ra. ²⁷Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuvi chi tyicuan caa.